



JUNGI GARDE JUNTERESSLI

FASNACHT 2018

Elifantastisch!

Im März isch es ändlig zer Ereffnig ko,
d Elifantealaag Tembea schtoot do!
Platz het s fir die Dier jetzt massig
und d Umgäähig isch wirklich rassig.

Felse, Dootbäum und Beggi zem Baade,
Fuetterautomate, wo zem Ässe yylaade.
S deent jo no guet, der ganzi Daag z gniesse,
und d Bsuecher frindlig mit em Rissel begriesse.

Vermuetlig gits dert au „Bauch, Beine, Po“,
e Fitnessprogramm speziell fir e Zoo,
und e Anti-Aging-Crème gege d Falte,
doch die wänn d Elifante jo lieber bhalte.

Mit digger Hut ka me sich jo schitze,
gege Wätter und dummi Bligg duet s nitze,
so ne Taktik isch jo nie verkeert,
drum hänn mir das vo dääne gleert.

E Kurs hänn mir Junteressli absolviert
und die Taktike sälber ussbrobiert,
mir sin ready – it doesn't matter
au fir e Faasnacht mit Wind und Räägewätter.

D Elifante hänn no mee Tipps gää,
die könne mir mit zem iebe nää,
e so ne Gedäächtnis wie die Ilpe hänn,
wär aigentlich das, wo mir au wänn.

Für d Faasnacht hänn mir is jetzt jewyyls zwai,
groossi Oore montiert dehai,
derhinter diemer d Noote schriibe,
damit si uns denn am Cortège bliibe.

Si hänn au welle mit is musiziere,
verschiideni Märschli zelebriere,
doch mit dämm trumpete, es isch bitz gruusig,
deene die fascht wie ne Guggemuusig.

Trotzdämm sinn mir zollidarisch,
finde Elifante cool, damit das glaar isch.
Die Stimmig im Zolli macht is Muet.
au d Work-life-balance stimmt dert guet.

Immer bitz Ässe zwische nem Laufe,
denn zum Spass bitz umme rauffe,
oder im Beggi go blantsche, macht Spass
so ne Elifantelääbe isch doch voll krass

Die Elifante sinn, so wie mir au,
Häärdedier, mit Maa und Frau
und so ne Clique – Elifantehäärde
isch doch s Allerbescht uff Äärde.

Mechtsch aaf Pfyffe oder Drummle, bisch
mindischdens 7 Jahr alt und hesch Luscht zem sälber
Fasnacht mache? So mäld dy lieber hit als morn bi
unserer Obfrau vo dr Junge Garde, dr Salome Hofer,
salome.hofer@bluewin.ch oder kumm diräggt ans
Yschribe vom 10. Meerz 2018, 11:00 bis 14:00 zu
uns in Käller an dr Drohtzugstrooss 69.

D Ladäärne-Uusstellig uff em Münschterplatz und d
Waage- und Reggwisyte-Uusstellig bi dr Kasärne sin
vom Määntig znacht bis am Mittwoch demoorge! Dört
und an de 3 Verkaufsständ (CINS) in dr Stadt ka men
au alli Zeedel und Schnitzelbängg, d Blaggedde und
dr Rädabängg kaufe. Am Fritig und Samschtig, 23. und
24. Februar 2018 isch Noochwuggswärbig vo dr 1.
Lektion im Zält uff em Barfi. D'Zeedellääsete isch am
Sunntig noo dr Fasnacht 2018 am 25. Februar vom
Fimfi bis am Siibeni zoobe in dr Baseldytschi Bihni (im
Lohnhof 4). Dr Ytritt isch vergäabe. D Foyer-Bar isch
vom Vieri ewägg offe.